

四庫全書

史部

欽定四庫全書

史部
元史

卷八十九至
九十一

御史_臣徐如澍覆勘

總校官編修_臣朱鈐

欽定四庫全書

元史卷八十九

明翰林學士張中大夫知制誥兼修國史宋濂等修

志第三十九

百官五

儲政院秩正二品至元十九年立詹事院備左右輔翼

皇太子之位置左右詹事各一員副詹事詹事丞院判

各一員吏屬六十有二人別置宮臣賓客二員左右諭

德左右贊善各一員校書郎二員中庶子中允各一員
三十一年太子裕宗既薨乃以院之錢糧選法工役悉
歸太后位下改為徽政院以掌之大德九年復立詹事
院尋罷十一年更置詹事院秩從一品設官十二員至
大四年罷延祐四年復立七年罷泰定元年罷徽政院
改立詹事如前天曆元年改詹事院為儲慶使司二年
罷復立詹事院未幾改儲政院院使六員正二品同知
二員正三品僉院二員從三品同僉二員正四品院判

二員正五品司議二員從五品長史二員正六品照磨
二員管勾二員俱正八品掾史一十二人譯史四人回
回掾史二人通事知印各二人宣使十人典史六人其
屬附見

家令司秩三品家令家丞各二員典簿二員照磨一
員掌太子飲膳供帳倉庫至元二十年置三十一年
改內宰司隸徽政大德十一年復立秩陞從二至大
四年罷延祐四年復立秩正三品七年罷泰定元年

復以內宰司為家令司天歷元年罷未幾復立二年
又罷

典幄署掌太子供帳令丞各二員書史書吏各二人
府正司秩從三品掌鞍轡弓矢等物至元二十年置
府正府丞各二員典簿二員照磨一員三十一年改
官正司大德十一年復為府正司至大四年罷延祐
四年復立七年罷泰定元年復立天歷二年增府正
府丞各二員尋罷

資武庫掌軍器提點一員大使一員

冀用庫掌鞍轡提點一員大使一員

延慶司秩正三品掌修建佛事使二員同知一員副
使典簿各二員照磨一員至元二十二年始立隸詹
事院三十一年隸徽政院大德十一年立詹事院別
立延慶司秩仍正三品置卿丞等員泰定元年改隸
詹事院天歷元年罷二年復立增丞二員

典用監卿四員太監二員少監二員丞二員經歷知

事各一員照磨一員掌供須文成藏珍三庫內府供
給段匹寶貨等物至大元年立天歷二年設官如故
以三庫隸內宰司

典醫監秩正三品領東宮太醫修合供進藥餌至元
十九年置典醫署秩從五品三十一年改掌醫署尋
罷大德十一年復立典醫監至大四年罷泰定四年
復立署天歷二年改典醫監秩正三品置達嚕噶齊
二員卿三員太監二員少監二員丞二員經歷知事

各一員吏屬凡十八人其屬司一局二

廣濟提舉司達嚕噶齊一員提舉同提舉副提舉
各一員掌修合藥餌以施貧民

行典藥局達嚕噶齊一員大使副使各一員掌供
奉東宮藥餌

典藥局達嚕噶齊一員大使副使直長各二員掌
修製東宮藥餌

典收監秩正三品卿二員太監二員少監二員冰二

員經歷知事各一員照磨一員吏屬凡十六人掌學
畜之事天歷二年始置

儲膳司秩正三品卿四員少卿二員丞二員主事二
員照磨一員令史六人譯史通事知印各二人奏差
六人典史四人掌皇太子飲膳之事天歷二年立

典寶監秩正三品卿太監少監丞各二員經歷知事
各一員吏屬八人至元十九年立典寶署從五品二
十年陞正五品三十一年罷大德十一年立監秩正

三品至大四年罷延祐四年復立七年罷泰定元年復置天曆元年罷二年復置

以上俱係詹事院司屬

掌謁司秩正三品司卿四員少卿四員丞二員典簿二員典書九人奏差二人知印譯史通事各一人至元三十一年改典寶署為掌謁司秩從五品設官如之元貞元年陞四品設官四員大德十一年陞正三品至治三年罷

甄用監秩正三品卿三員太監少監丞各三員經歷
知事照磨各一員掌供須丈成藏珍三庫出納之事
至大元年設至治三年罷

延福司秩正三品令丞各四員典簿二員照磨二員
掌供帳及扈從蓋造之人大德十一年置後併入羣
牧監

章慶使司秩正三品司使四員同知副使司丞各二
員經歷都事各二員照磨管勾各一員至大三年立

至治三年罷

奉徽庫秩從五品提點大使各二員副使四員庫子
六人掌內府供給至治三年罷併入文成等庫

壽和署秩正五品署令四員署丞六員舊隸儀鳳司
皇慶元年改隸徽政院遂為章慶使司之屬至治二
年罷

上都掌設署秩正五品署令五員署丞二員至大四
年立至治三年罷

掌醫監秩正五品領監官一員達嚕噶齊一員御四員太卿五員太監五員少監六員丞二員至元三十一年改典醫為掌醫署秩五品至大元年陞監設已上官員至治三年罷

修合司藥正司秩從五品達嚕噶齊一員副使直長各二員掌藥六人掌修合御用藥餌至治三年罷行篋司藥局秩從五品達嚕噶齊一員使副使各二員掌供奉御用藥餌至治三年罷

廣濟提舉司秩從五品達嚕噶齊提舉同提舉副提舉各一員掌修合藥餌以濟貧民

羣牧監秩正二品掌中宮位下孳畜鄉三員大卿少卿監丞各二員至大四年立至治三年罷

掌儀署秩正五品令丞各二員掌戶口房舍等事至元二十年立隸詹事院三十一年改隸徽政院泰定元年改典設署

上都掌儀署秩五品令丞各一員掌戶口房舍等事

大德十一年立至治二年罷

江西財賦提舉司秩從五品達魯噶齊一員提舉同
提舉副提舉各一員掌事產戶口錢糧造作等事至
元二十七年立至治二年罷

織染局使副使局副各一員相副官一員

桑落娥眉洲管民提領所提領副提領各一員

封郭等洲管民提領所提領同提領副提領各一員

龍興打捕提領所提領副提領各一員

鄂州等處民戶水陸事產提舉司達嚕噶齊一員提
舉同提舉副提舉各一員掌太子位下江南園囿地
土莊宅人戶至元二十一年立隸詹事後改隸徽政
至治三年罷

瑞州上高縣戶計長官司秩從五品達嚕噶齊一員
長官副長官各一員領本處戶八千後隸徽政院至
治三年罷

以上俱係徽政院司屬

左都威衛使司秩正三品衛使三員副使二員僉事二員
經歷知事照磨各一員至元十六年以侍衛親軍一萬
戶撥屬東宮立侍衛都指揮使司二十一年改隆福宮
左都威衛使司隸中宮至大三年選造作軍士八百人
立千戶所一百戶翼八以領之而分局造作延祐二年
置教授二至治三年罷軍匠千戶所

鎮撫所鎮撫二員都目一員

行軍千戶所千戶三員副千戶二員知事彈壓各一

員百戶二十員

屯田左右千戶二所千戶二員都目一員彈壓一員
百戶每所二十員

弩軍千戶所千戶二員都目一員彈壓一員

資食倉大使一員副使一員

右都威衛使司秩正三品衛使三員副使二員僉事二
員經歷知事照磨各一員中統三年以世祖五拔下特
點齊立總管府秩四品設總管一員二十一年撥屬東

宮二十二年改蒙古侍衛親軍都指揮使司秩正三品
三十一年改隆福宮右都威衛使司秩仍舊延祐二年
置儒學教授一員四年增蒙古字教授一員其屬附見
鎮撫司鎮撫二員都目一員

行軍千戶凡五所秩正四品千戶五員副千戶五員
知事五員百戶五十員彈壓五員

屯田千戶所秩正五品千戶二員彈壓一員百戶七
員都目一人

廣貯倉秩從九品大使一員副使一員攢典一人

衛候直都指揮使司秩正四品至元二十年以控鶴一百三十五人隸府正司三十年隸家令司三十一年增控鶴六十五人立衛候司以領之兼掌東宮儀從金銀器物置衛候一員副衛候二員及儀從庫百戶大德十一年復增懷孟從行控鶴二百人陞都指揮使司秩正四品延祐元年陞正三品七年陞正四品至治三年罷四年以控鶴六百三十人歸中宮位下泰定四年復立

司秩仍正四品達魯噶齊二員佩三珠虎符都指揮使
二員佩三珠虎符副指揮使二員佩雙珠虎符知事一
員提控案牘一員令史四人譯史通事各一人奏差二
人其屬附見

百戶所凡六秩從七品每所置百戶二員

儀從庫稅從七品大使二員副使一員

內宰司秩三品至元三十一年既立徽政院改家令為
內宰司泰定元年復為家令司天歷元年罷未幾復立

二年罷復改內宰司內宰六員司丞四員典簿二員照磨二員令史十有二人譯史知印通事各二人奏差六人典吏四人其屬附見

典膳署秩五品令二員丞二員書吏二員桑齊三十
五人掌內府飲膳之事至元十九年始立隸家令司
三十一年改掌膳隸內宰泰定元年復改為典膳
洪濟鎮提領三員掌辦納廌隻隸典膳署

柴炭局秩從七品提領一員大使一員副使一員至

元二十年以東宮位下民一百戶燒炭二月軍一百人採薪二月供內府歲用立局以主其出納設官三員俱受詹事院劄大德十一年隸樞政院

藏珍文成供須三庫秩俱從五品各設提點二員大使二員副使二員分掌金銀珠玉寶貨段匹絲綿皮羶鞍轡等物國初詹事出納之事未有官署印信至元二十七年分為三庫各設官六員及庫子有差提舉備用庫秩從五品達嚕噶齊一員提舉一員大

使一員提控案牘一員掌出納田賦財賦差發課程
一切錢糧規運等事至元二十年置二十二年設達
魯噶齊及首領官

嘉醞局秩五品至元十七年立掌飲局大德十一年
改掌飲司秩陞正四品延祐六年除掌飲司為局至
治三年罷泰定四年復立天歷二年改嘉醞局提點
二員大使二員副使二員書史一員書吏四人

西山煤窑場提領一員大使一員副使二員俱受徽

政院劉至元二十四年置領馬鞍山大峪寺石灰煤
窑辦課奉皇太后位下

保定等路打捕提領所秩從七品提領四員典史一
員至元十一年收集人戶為打捕戶計及招到管絲
銀差發稅糧等戶立提領所

廣平彰德課麥提領所秩從七品至元三十年以二
路渡江時駐蹕之地召民種佃遂立所置官統之
廣惠庫大使一員副使一員至元三十年以鈔本五

千錠立庫放典收息納于備用庫

豐裕倉秩從七品掌收貯中宮位下糯米至治二年
設提領等官三年罷天歷二年立儲政院復給印置
監支納一員倉使一員攢典二人

備物庫秩從七品掌東宮造作顏料及雜器等物至
元二十五年置隸詹事院大德元年給印十一年置
官四員至治三年罷泰定三年復立大使一員副使
二員庫子二人攢典二人

管領齊哩克昆諸色民匠都總管府秩正三品達魯噶齊一員總管一員並正三品同知一員正四品副總管二員正五品經歷一員從七品知事二員從八品提控案牘照磨管勾各一員令使十人知印二人通事一人譯史二人奏差六人典吏四人領齊哩克昆民匠造作等事至大三年立總管府至治三年罷天歷元年復立隸儲政院其屬附見

管領大都齊哩克昆諸色民匠提舉司秩正五品達

嚕噶齊一員提舉一員同提舉副提舉各一員首領
官一員司吏四人部役二人

管領上都齊哩克昆諸色人匠提舉司秩正五品達
嚕噶齊一員提舉一員同提舉副提舉各一員首領
官一員司吏四人部役二人

典製局秩從七品大使副使各一員直長二員

典設署秩從五品令丞各四員書史一員書吏四人
掌內府珠拉齊二百二十戶至元二十年置三十一

年改掌儀署隸內宰司泰定元年復為典設天歷二年隸本府

雜造人匠提舉司秩從四品達魯噶齊一員提舉一員同提舉副提舉各一員都目一員司吏二人部役二人至元八年罷初隸繕珍司至大三年改隸章慶司章慶罷凡造作之事悉歸之天歷二年隸本府雜造局秩正九品院長一員直長一員管勾一員

隨路諸色人匠都總管府秩正三品中統五年招集析

居放良還俗僧道等戶習諸色匠藝立管領齊哩克昆
總管府以司其造作秩正四品至元九年陞正三品大
德十一年改繕珍司延祐六年陞徽儀使司秩正二品
七年仍為繕珍司官屬如舊至治三年復改都總管府
達魯噶齊一員總管二員並正三品同知一員正五品
副總管二員從五品經歷知事照磨提控案牘各一員
令史四人譯史一人奏差二人典史一人其屬附見

上都諸色民匠提舉司秩從五品提舉一員同提舉

副提舉吏目各一員至元十九年立至大元年增達
魯萬齊一員至治三年省增置之員設官如舊

金銀器盒局秩從八品大使一員副使一員至元七
年置

染局秩正八品大使一員副使一員至元七年置
雜造局正八品大使副使各一員至元七年置

泥丸局大使副使各一員至元七年置

鐵局大使一員副使一員至元七年置

上都葫蘆局大使一員副使一員至元七年置

器物局副使一員中統五年置

研金局大使一員至元二十年置

鞍子局大使一員至元七年置

雲州管納色提領所提領一員掌納色人戶至元七年置

大都等路諸色人匠提舉司秩從五品提舉同提舉副提舉各一員至元十六年置其屬附見

雙線局提領一員副使一員至元十八年置受磨
事院劄

大小木局大使一員副使一員直長一員至元十
八年置受磨事院劄元貞元年併領皇后位下木
局

金鉢局大使一員副使一員直長一員至元七年
立受府劄

管納色提領一員受府劄管銅局筋局鎖免局粒

釘局雕木局至元三十年置

成製提舉司秩從五品達嚕噶齊一員提舉一員同
提舉副提舉各一員吏目一員司吏四人部役二人
掌縫製之事至元二十九年置設官四員受院劄大
德二年陞提舉司至治三年罷泰定四年復置

上都大都貂鼠軟皮等局提領所提領二員至元九
年置受府劄二十七年給從七品印改受省劄大德
十一年給從六品印改受勅牒至治三年仍改受省

劉其屬附見

大都軟皮局局使一員副使一員至元十三年置
斜皮局局使一員副使一員至元十三年置

上都軟皮局局使一員副使一員至元十二年置
牛皮局大使一員至元十三年置

金絲子局大使一員副使一員直長一員至元十
二年置掌金絲子匠造作之事

畫油局大使一員副使一員直長一員至元二十

年置受詹事院劄

鹽局提領一員大使一員副使一員直長一員至

元十二年收集人戶為鹽匠二十六年始立局

材木庫大使副使各二員至元十六年置掌造作

材木

瑤瑤玉局大使副使各一員直長二員至元十四

年置

大都鄂囉提領所提領一員掌理人匠詞訟至元十

八年置受詹事院劄

上都鄂羅提領所提領一員同提領一員掌理人匠
詞訟至元十八年置受詹事院劄

上都異樣毛子局大使一員副使一員至元二十年
置受詹事院劄

上都總局大使一員副使一員直長一員至元二十
年置受詹事院劄

上都斜皮等局大使一員副使一員至元二十年置

受詹事院劄

蔚州定安等處山場採木提領所秩正八品提領一員大使一員副使二員至元十二年置

上都隆興等路雜造鞍子局提領一員大使一員直長二員至元二十二年置受詹事院劄

真定路冀州雜造局大使一員副使一員掌造作之事至元十九年置

珠翠局大使副使各一員直長一員至元三十年置

管領大都等路打捕鷹房膳粉人員總管府秩正四品
至元十四年打捕鷹房達魯噶齊招集平灤散逸人戶
二十九年立總管府大德十一年撥隸皇太后位下延
祐六年陞正四品置達魯噶齊一員總管一員首領官
一員令史四人譯史一人奏差二人

管領本投下大都等路齊哩克昆民匠總管府國初招
集齊哩克昆哈噶齊民匠一千一百餘戶中統元年立
總管府二年給六品印掌戶口錢帛差發等事至元九

年撥隸安西王位下皇慶元年又屬公主皇后位下延祐元年改隸章慶司天歷二年又改隸儲政院達嚕噶齊一員總管一員俱受御寶聖旨同知一員副總一員俱受安西王令旨知事一員令史二人其屬附見

織染提舉司秩正七品掌織造段匹提舉一員受安西王令旨同提舉一員木府擬人副提舉一員都目一員俱受安西王傳劄司吏一人

管民提領所凡三大都路兼奉聖州提領六員曹州

提領二員河間路提領三員受本府劄

管地提領所凡二奉聖州提領三員東安州提領三

員受本府劄

管領諸路齊哩克昆民匠都總管府秩正三品至元七年
招集析居從良還俗僧道編籍人戶為齊哩克昆立
總管府領之十四年以所隸戶口造作屬中宮十六年
立織染雜造二局以司造作立提領所以司徭役二十五
年改陞正三品延祐六年改繕用司仍三品七年復改

府達嚕噶齊一員總管一員並正三品同知二員正五
品副總管二員從五品經歷知事提按案牘兼照磨各
一員令史五人譯史一人其屬附見

各處管民提領所秩正七品

河間 益都 保定 冀寧 晉寧 大名

濟寧 衛輝 宣德

以上九所提領副提領各一員相副官二員典
史一員司吏二人

汴梁 曹州 大同 開元 大寧 上都

濟南 真定

以上八所提領副提領相副官各一員典史一員司吏一人

大都 歸德 鄂漢

以上三所提領同提領副提領各一員相副官一員大都增一員典史司吏各一人

織染局秩正七品大使副使相副官各一員典史司

吏各一人

雜造局秩正七品大使副使相副官各一員典吏司吏各一人

弘州衣錦院秩正七品大使副使直長各一員典吏司吏各一人

豐州毛子局秩正七品大使副使各一員典吏司吏各一人

縉山毛子旅匠局秩正七品大使一員典吏司吏各

一人

徐邛提舉司秩正五品提舉同提舉副提舉各一員

吏目司吏各一人

廣備庫大使副使各一員俱受院劄

汴梁等路管民總管府秩正三品達魯噶齊總管同知

府判各一員經歷知事提控案牘各一員國初立息州

總管府領歸附六千三百餘戶元貞元年又併壽潁歸

附民戶二千四百餘戶改汴梁等路管民總管府掌各

屯佃戶差發子粒隸徽政院泰定元年改隸詹事院後隸儲政院其屬庫一提領所八管佃提領十二

常盈庫大使副使各一員

提領所

新降戶 真陽 新蔡 息州 汝寧 陳州

汴梁 鄭州 真定

以上八所每所提領各一員副提領相副官有

差

管佃提領

汝陽五里岡

許州郟城縣

青龍宋岡

陳州須城商水等屯

分山曲堰

許州臨潁屯

許州襄城屯

汝陽金鄉屯

潁豐堰 遂平橫山屯

上蔡浮台屯

汝陽縣烟亭屯

以上十有二處各設提領二員

江淮等處財賦都總管府秩正三品達魯噶齊總管各

一員並正三品同知一員正五品副總管二員從五品
經歷知事照磨兼提控案牘各一員令史十五人奏差
十五人譯史一人典吏三人至元十六年以宋謝太后
福王所獻事產及賈似道地土劉堅等田立總管府以
治之大德四年罷命有司掌其賦天歷二年復立其賦
復歸焉

儲用庫提領大使副使各一員

杭州織染局大使副使相副官各一員

揚州等處財賦提舉司達嚕噶齊提舉同提舉副提舉各一員提控案牘都目各一員其屬附見

安慶等處河泊所提領大使副使各一員

建康等處財賦提舉司達嚕噶齊提舉同提舉副提舉各一員提控案牘都目各一員

建康織染局大使副使相副官各一員

黃池織染局大使副使相副官各一員

建康等處三湖河泊所提領大使副使相副官各一

員

池州等處河泊所提領大使副使各一員

平江等處財賦提舉司達魯噶齊提舉同提舉副提
舉各一員提控案牘都目各一員

杭州等處財賦提舉司設官全上

陝西等處管領毛子匠提舉司達魯噶齊提舉各一
員國初收集織造毛子人匠至元三年置官二員皆
世襲

昭功萬戶都總使司秩正三品都總使二員正三品同知一員從三品副使二員正四品經歷知事照磨各一員令史六人譯史六人知印三人克埒穆爾齊二人奏差六人典史四人至順二年立凡文宗潛邸扈從之臣皆領於是府其屬則宮相膳工等司

宮相都總管府秩正三品達嚕噶齊一員都總管一員副達嚕噶齊二員同知二員副總管二員經歷知事提控案牘承發架閣各一員至順二年罷宮相府

并鶴馭司改齊哩克昆錢糧總管府為本府

織染雜造人匠都總管府秩正三品達魯噶齊一
員總管一員同知一員副總管二員經歷知事提
控案牘照磨各一員至元二十年為管領織染段
匹匠人設總管府元貞二年以營繕浩繁事務冗
滯陞為都總管府隸徽政院天歷九年改隸儲慶
使司三年改屬宮相

織染局秩從七品大使一員副使一員至元二

十三年改織染提舉司為局

綾錦局秩從七品大使一員副使一員至元八年置九年以招收析居放良還俗僧道為工匠二百八十有二戶教習織造之事遂定置以上官

紋錦局秩從七品大使一員副使一員國初以招收漏籍人戶各管教習立局領送納絲銀物料織造段匹至元八年設長官十二年以諸人

匠賜東宮十三年罷長官設以上官掌之

中山局秩從七品大使一員副使一員國初以招收隨路漏籍不當差人戶立局管領教習織造至元十二年以賜東官遂定置局官如上

真定局秩從七品大使一員國初招收戶計中統元年置掌織染造作至元十六年以賜東官設官悉如舊

弘州蓐麻林納奇實局秩從七品二局各設大

使一員副使一員至元十五年招收析居放良
等戶教習人匠織造納奇實於弘州葺麻林二
處置局十六年併為一局三十一年徽政院以
兩局相去一百餘里管辦非便復為二局

大名織染雜造兩提舉司秩正六品至元二十
一年置掌大名路民戶內織造人匠一千五百
四十有奇各置提舉同提舉副提舉一員三十
年增置雜造達魯噶齊一員

供用庫秩從九品大使副使各一員受徽政院
劄國初為絞錦總庫至元二十一年改為供用

庫

管領諸路打捕鷹房納綿等戶總管府秩正三品達
魯噶齊都總管同知治中府判各一員經歷知事提
控案牘各一員掌人匠一萬三千有奇歲辦稅糧皮
貨採捕野物鷹鷄以供內府至元十二年賜東宮位
下遂以真定所立總管府移置大都隸詹事十六年

合併所管之戶置都總管以總治之三十一年詹事院罷隸徽政至大四年隸崇祥院延祐六年又隸詹事天歷元年隸儲慶使司至順元年改屬宮相府

管領上都等處打捕鷹房納綿等戶大使司大使副使各一員

管領順德等處打捕鷹房納綿等戶提領所達魯噶齊提領副提領各一員

管領冀寧等處打捕鷹房納綿等戶提領所提領

副提領各一員

管領大都左右巡院等處打捕鷹房納綿等戶提
領所提領副提領各一員

管領固安等處打捕鷹房納綿等戶提領所提領
副提領各一員

管領中山等處打捕鷹房納綿等戶提領所提領
副提領各一員

管領濟南等處打捕鷹房納綿等戶提領所提領

副提領各一員

管領德州等處打捕鷹房納綿等戶提領所提領

副提領各一員

管領益都等處打捕鷹房納綿等戶提領所提領

副提領各一員

管領大同等處打捕鷹房納綿等戶提領所提領

副提領各一員

管領濟寧等處打捕鷹房納綿等戶提領所提領

副提領各一員

管領興和等處打捕鷹房納綿等戶提領所提領
副提領各一員

管領晉寧等處打捕鷹房納綿等戶提領所提領
副提領各一員

管領順州稻田提領所提領副提領各一員

管領懷慶稻田提領所提領一員

管領檀州等處打捕鷹房納綿等戶提領所提領

副提領各一員

管領大寧等處打捕鷹房納綿等戶提領所提領
副提領各一員

管領薊州等處打捕鷹房納綿等戶提領所提領
副提領各一員

管領真定等處打捕鷹房納綿等戶提領所設官
全上

管領趙州等處打捕鷹房納綿等戶提領所設官

全上

管領保定等處打捕鷹房納綿等戶提領所設官

全上

管領冀州等處打捕鷹房納綿等戶提領所設官

全上

管領汴梁等處打捕鷹房納綿等戶提領所設官

全上

廣衍庫大使一員

管領滑山炭場所大使一員

繕工司秩正三品卿二員少卿二員丞二員經歷知
事照磨兼提控案牘管勾承發架閣各一員令史四
人譯史二人知印二人克瑋穆爾齊一人典史二人
掌人匠營造之事天曆二年置其屬附見

金玉珠翠提舉司達嚕噶齊提舉同提舉副提舉
各一員吏目一員司吏四人

大都織染提舉司提舉二員同提舉副提舉各一

員吏目一員司吏四人

大都雜造提舉司達魯噶齊提舉同提舉副提舉
各一員吏目一員司吏四人

富昌庫大使一員副使一員庫子二人攢典一人
內史府秩正二品內史九員正二品中尉六員正三品
司馬四員正四品諮議二員從五品記室二員從六品
照磨兼管勾承發架閣庫從八品掾史八人譯史四人
知印通事各二人宣使五人典史二人至元二十九年

封晉王于太祖四鄂爾多之地改王傅為內史秩從二
置官十四員延祐五年陞正二品給印分司京師并分
置官屬

延慶司秩正三品掌王府祈禳之事使二員正三品
同知二員正四品典簿一員從七品令史二人譯史
知印通事各一人奏差二人至元二十七年置

斷事官秩正三品理王府詞訟之事斷事官一十六
員正三品經歷知事各一員令史三人

典軍司秩從七品掌控鵬百二十有六人典軍二員
副使二員大德四年置

隨路諸色民匠打捕鷹房都總管府秩正二品總四鄂
爾多位下戶計民匠造作之事達嚕噶齊二員都總管
一員同知一員副總管二員經歷知事提控案牘各一
員令史四人奏差二人至元二十四年置官吏不入常
調凡鄂爾多之事復置四總管以分掌之

管領保定等路阿哈探馬兒諸色人匠總管府秩從三

品掌太祖大鄂爾多一切事務達嚕噶齊總管同知副
總管各一員知事一員吏二人至元十七年置

管領曹州東平等路民匠提舉司秩從五品達嚕噶齊
提舉同提舉副提舉各一員至元十七年置

管領大都納綿提舉司秩從六品達嚕噶齊提舉副提
舉各一員至元十七年置

管領上都大都奉聖州長官司秩從六品管領出征軍
五十有一戶達嚕噶齊長官各一員至元十七年置

管領保定織染局秩從六品管匠一百有一戶達魯噶齊提舉同提舉副提舉各一員至元十七年置

管領豐州聚齊局頭目一員掌織造花氈至元十七年置

管領打捕鷹房民匠達魯噶齊總管府秩正四品掌二皇后鄂爾多位下歲賜財物造作等事達魯噶齊總管同知副總管知事各一員吏二人至元二十一年置

管領口子迤北長官司秩從五品掌領戶計二百有六

達嚕噶齊長官副長官各一員至元二十一年置

管領隨路諸色民匠達嚕噶齊等官秩正五品統民匠一千五百二十有五戶達嚕噶齊總管同知副總管各一員至元二十一年置

管領隨路打捕納綿民匠長官司秩從五品掌民匠一百七十有九戶達嚕噶齊長官各一員至元二十一年置

管領大都民匠提舉司秩正七品掌民匠二百有二戶

提舉同提舉副提舉各一員至元二十一年置

管領涿州成錦局人匠提舉司秩從五品領匠一百有
二戶達魯噶齊提舉同提舉副提舉各一員至元二十
一年置

管領河間民匠提舉司秩從四品掌民匠二百一十戶
達魯噶齊提舉同提舉副提舉各一員至元二十一年
置

管領河間滄州等處長官司秩正五品領戶計五百四

十有八達噶噶齊長官副長官各一員至元二十一年置

管領河間臨邑等處軍民長官司秩正七品掌軍民二百有二戶達噶噶齊長官副長官各一員至元二十一年置

管領隨路諸色民匠打捕鷹房等戶總管府秩從四品掌太祖鄂爾多四季行營一切事務達噶噶齊總管同知副總管知事各一員司吏二人大德二年置

管領涿州等處民匠異錦局秩正五品掌民匠一百五十戶達嚕噶齊提舉同提舉副提舉各一員大德二年置

管領上用織染局秩從七品掌工匠七十有八戶提舉同提舉副提舉各一員大德二年置

管領工都大都麴米等長官司秩從七品領民匠七十有九戶達嚕噶齊長官副長官各一員大德二年置
管領彰德等處長官司秩從七品掌民一百一十有七

戶達嚕噶齊長官副長官各一員大德二年置

管領上都大都等處長官司秩從五品掌民二百六十有一戶達嚕噶齊長官副長官各一員大德二年置

管領奉安等處長官司秩正七品掌民一百有一戶達

嚕噶齊長官副長官各一員大德三年置

管領曹州等處長官司秩從五品管民一百有五戶達

嚕噶齊長官副長官各一員大德二年置

管領隨路打捕鷹房諸色民匠齊哩克昆總管府秩從

二品掌太祖四皇后位下四季行營并歲賜造作之事
達嚕噶齊總管同知副總管各一員經歷知事提控案
牘兼照磨各一員司吏二人延祐五年置

管領大都上都打捕鷹房納米麴提舉司秩從五品統
領一百九十有五戶達嚕噶齊提舉各一員延祐五年
置

管領大都涿州織染提舉司秩從七品掌領九十有六
戶達嚕噶齊提舉各一員延祐五年置

管領河間路清州人匠提舉司秩從五品掌戶計一百三十有四戶達嚕噶齊提舉各一員延祐五年置

管領隨路打捕鷹房諸色民匠總管府秩正四品掌北安王位下歲賜錢糧之事達嚕噶齊總管同知副總管知事各一員至元二十二年置

管領大都上都納綿提舉司秩正七品掌納綿戶計七百有三戶達嚕噶齊提舉副提舉各一員至元二十二年置

管領大都等處金玉民匠稻田提舉司秩從五品掌納
綿人匠五百二十有一戶達魯噶齊提舉副提舉各一
員至元二十二年置

管領大都薊州等處打捕提舉司秩從五品掌打捕戶
及民匠六百餘戶達魯噶齊提舉副提舉各一員至元
二十二年置

雜造局秩正六品達魯噶齊一員提舉同提舉副提舉
各一員至元十六年置

齊哩克昆諸色民匠達嚕噶齊并管領上都納綿提舉
司秩正五品掌德濟鄂爾多位下齊哩克昆諸色民匠
及歲賜錢糧等事達嚕噶齊長官同知副長官各一員
提控案牘一員

上都人匠提領所秩從七品達嚕噶齊提領同提領副
提領各一員至元二十四年置

上都大都提領所秩從七品掌本位下齊哩克昆等事
達嚕噶齊大使副使各一員至元二十七年置

歸德長官司秩從六品達嚕噶齊長官副長官各一員
至治三年置

管領上都大都諸色人匠納綿戶提舉司秩從五品掌
鄂爾多位下歲賜等事達嚕噶齊提舉同提舉各一員
至元十七年置

致用庫秩從七品提領大使各一員副使二員至元二
十七年置

提領司秩從八品提領三員副提領一員至元十一年

置

上都人匠局秩從七品達嚕噶齊二員副使二員至元二十七年置

諸王府官庫春布哈太子至齊王位下凡四十五王每位下各設王傳傳尉司馬三員傳尉惟庫春布哈額布根鄂蘭烏克三王有之自此以下皆稱府尉別於傳之下司馬之上而三員並設又多寡不同或少至一員或多至三員者齊王則又獨設王傳一員

都護府秩從二品掌領舊州城及輝和爾之居漢地者
有詞訟則聽之大都護四員從二品同知二員從三品
副都護二員從四品經歷一員從六品都事一員從七
品照磨兼承發架閣庫管勾一員正八品令史四人譯
史二人通事知印各一人宣使四人典史二人至元十
一年初置輝和爾斷事官秩三品十七年改領北庭都
護府秩二品置官十二員二十年改大理寺秩正三品
二十二年復為大都護品秩如舊延祐三年陞正二品

七年復從二品定官制如上

崇福司秩二品掌領瑪拉噶錫喇卜伊嚕勒昆十字寺
祭享等事司使四員從二品同知二員從三品副使二
員從四品司丞二員從五品經歷一員從六品都事一
員從七品照磨一員正八品令史二人譯史通事知印
各一人宣使二人至元三十六年置延祐二年改為院
置領院事一員省併天下伊嚕勒昆掌教司七十二所
悉以其事歸之七年復為司後定置已上官員

元史卷八十九

欽定四庫全書

元史卷九十

明翰林學士亞中大夫知制誥兼修國史宋濂等修

志第四十

百官六

大都留守司秩正二品掌守衛宮闕都城調度奉路供
億諸務兼理營繕內府諸邸都宮原廟尚方車服殿廡
供帳內苑花木及行幸湯沐宴游之所門禁關鑰啓閉

之事留守五員正二品同知二員正三品副留守二員
正四品判官二員正五品經歷一員從六品都事二員
從七品管勾承發架閣庫一員正八品照磨兼覆料官
一員部役官兼壕寨一員令史十八人宣使十七人典
吏五人知印二人蒙古筆且齊三人回回令史一人通
事一人至元十九年罷宮殿府行工部置大都留守司
兼本路都總管知少府監事二十一年別置大都路都
總管府治民事并少府監歸留守司皇慶元年別置少

府監延祐七年罷少府監復以留守兼監事其屬附見
修內司秩從五品領十四局人匠四百五十戶掌修
建宮殿及大都造作等事提點一員大使一員副使
一員直長五員吏目一員照磨一員部役七員司吏
六人中統二年置至元中增工匠計一千二百七十
有二戶其屬附見

大木局提領七員管勾三員掌殿閣營繕之事中
統二年置

小木局提領二員同提領一員副提領三員管勾
二員提控四員中統四年置

泥厦局提領八員管勾二員中統四年置

車局提領二員管勾一員中統五年置

粧釘局提領二員同提領二員中統四年置

銅局提領一員同提領一員管勾一員中統四年
置以上六局秩從八品

竹作局提領二員提控一員中統四年置

繩局提領二員中統五年始置

祇應司秩從五品掌內府諸王邸第異巧工作修禳
應辦寺觀營繕領工匠七百戶大使一員從五品副
使一員正七品直長三員正八品吏目一員司吏二
人國初建兩京殿宇始置司以備工役其屬附見

油漆局提領五員同提領副提領各一員掌兩都
宮殿髹漆之工中統元年置

畫局提領五員管勾一員掌諸殿宇藻繪之工中

統元年置

銷金局提領一員管勾一員掌諸殿宇裝鑒之工

中統四年置

裱稍局提領一員掌諸殿宇裝潢之工中統二年置

燒紅局提領二員掌諸宮殿所用心紅顏料至元元年置

器物局秩從五品掌內府宮殿京城門戶寺觀公廨

營繕及御用各位下鞍轡曳克轎子帳房車輛金寶
器物凡精巧之藝雜作匠戶無不隸焉大使一員從
五品副使一員正七品直長二員正八品吏目一員
司吏二人中統四年始立御用器物局受省劄至元
七年改為器物局秩如上其屬附見

鐵局提領三員管勾三員提控一人掌諸殿宇輕
細鐵工中統四年置

減鐵局管勾一員提控二人掌造御用及諸宮邸

繫腰中統四年置

盒鉢局提領二員掌製御用繫腰中統四年置

成鞍局提領三員掌造御用鞍轡象轎中統四年置

羊山鞍局提領一員提控一員掌造常課鞍轡諸物至元十八年置

網局提領二員管勾一員掌成造宮殿網扇之工
中統四年置

刀子局提控二員掌造御用及諸宮邸寶貝佩刀之工中統四年置

旋局提領二員掌造御用異樣木植器物之工中統四年置

銀局提領一員掌造御用金銀器盒繫腰諸物中統四年置

轎子局提領一員掌造御用異樣木植鞍子諸物中統四年置

採石局秩從七品大使副使各一員掌夫匠營造
內府殿宇寺觀橋牌石材之役至元四年置石局
總管十一年撥採石之夫二千餘戶常任工役置
大都等處採石提舉司二十六年罷立採石局

山場提領一員管勾五員至元四年置

大都城門尉秩正六品尉二員副尉一員掌門禁啓
閉管鑰之事至元二十年置以四集寨巴噶齊為之
二十四年復以六衛親軍參掌凡十有一門曰麗

正曰文明曰順承曰平則曰和義曰肅清曰安貞曰
健德曰光熙曰崇文曰齊化每門設官如上

犀象牙局秩從六品大使副使直長各一員司吏一
人掌兩都宮殿營繕犀象龍牀卓器繫腰等事中統
四年置設官一員至元五年增副使管匠戶一百有
五十其屬附見

雕木局提領一員管勾一員掌宮殿象牙至元十
一年置

牙局提領一員管勾一員掌宮殿象牙龍牀之工
至元十一年置

大都四窑場秩從六品提領大使副使各一員領匠
夫三百餘戶營造素白琉璃磚瓦隸少府監至元十
三年置其屬三

南窑場大使副使各一員中統四年置

西窑場大使副使各一員至元四年置

琉璃局大使副使各一員中統四年置

凡山採木提舉司秩從五品掌採伐車輛等雜作木
植及造濟遶繫腰刀把諸物達嚕嚕齊提舉各一員
並從五品同提舉一員正七品副提舉一員正八品
吏目一員司吏六人至元十四年置

上都採山提領所秩從八品提領副提領提控各一
員至元九年以採伐材木鍊石為灰徵發夫匠一百
六十三戶遂置官以統之

凡山宛平等處管夫匠所提領二員同提領二員管

領催車材戶提領一員至元十五年置

器備庫秩從五品提點一員從五品大使一員從六
品副使二員正七品直長四員正八品掌殿閣金銀
寶器二千餘事至元二十七年置

甸皮局秩正七品大使一員管匠三十餘戶至元七
年置十四年始定品秩二十一年改隸留守司歲辦
熟造紅甸羊皮二千有奇

上林署秩從七品署令署丞各一員直長一員掌宮

苑栽植花卉供進蔬菜種苜蓿以飼馳馬備煤炭以給營繕至元二十四年置

養種園提領二員掌西山淘煤羊山燒造黑白木炭以供修建之用中統三年置

花園管勾二員掌花卉果木至元二十四年置

苜蓿園提領三員掌種苜蓿以飼馬駝膳羊

儀鷹局秩正五品掌殿庭燈燭張設之事及殿閣浴室門戶鎖鑰苑中龍舟圈檻珍異禽獸給用內府諸

宮太廟等處祭祀庭燎縫製簾帷灑掃掖庭領珠拉齊水手樂人禁蛇人等二百三十餘戶輪直集賽大使四員正五品副使二員從六品直長二員正八品都目一員書吏二人庫子一人至元十一年置局秩正七品二十三年陞正五品至大四年仁宗御西宮又別立儀鸞局設置亦同延祐七年增大使二員以宦者為之領四提領所

珠拉齊提領八員提控四員

水手提領二員

針工提領一員

蠟燭局提領一員

木場提領一員大使一員副使一員掌受給營造宮
殿材木至元四年置南東二木場十七年併為一場
大都路管領諸色人匠提舉司秩從五品掌大都諸
色匠戶理斷昏田詞訟等事提舉一員從五品同提
舉一員正七品副提舉一員正八品吏目一人司吏

二人中統四年置人匠鄂囉總管府秩從四品至元十二年改提舉司十五年兼管採石人戶秩如舊

真定路東平路管匠官秩從七品每路大使一員副使一員中統四年置

保定路宣德府管匠官秩從七品保定大使一員副使一員管匠官一員宣德管匠官二員

大名路管匠官秩從七品大使一員管匠官三員中統四年置

晉寧冀寧大同河間四路管匠官秩從七品每路大使副使各一員中統四年置

收支庫秩正九品掌受給營繕提點一員大使一員副使二員直長二員庫子二人至元四年置

諸色庫秩從八品掌修內材木及江南徵索異樣木植并應辦官寺齋事大使一員副使一員司庫二人至大四年置

太廟收支諸物庫秩從八品大使副使各一員司庫

四人至治二年以營治太廟始置

南寺北寺收支諸物二庫秩從七品提領大使各一員副使二員司庫之屬凡十人至治元年以建壽安山寺始置

廣誼司秩正三品司令二員正三品同知二員正四品副使二員正五品判官二員正六品經歷知事各二員照磨一員總和顧和買營繕織造工役供億物色之務至元十四年改覆實司辨驗官兼提舉市令

司大德五年又分大都路總管府官屬置供需府至
順二年罷之立廣誼司

武備寺秩正三品掌繕治戎器兼典受給卿四員正三
品同判六員從三品少卿四員從四品丞四員從五品
經歷知事各一員照磨兼提控案牘一員承發架閣庫
管勾一員辨驗弓官二員辨驗筋角翎毛等官二員令
史十有三人至元五年始立軍器監秩四品十九年陞
正三品二十年立衛尉院改軍器監為武備監秩正四

品隸衛尉院二十一年改監為寺與衛尉並立大德十一年陞為院至大四年復為寺設官如舊其所轄屬官則自為選擇其匠戶之能者任之

壽武庫秩從五品提點二員從五品大使二員正六品副使四員正七品庫子一十人至元十年以衣甲庫改置

利器庫秩從五品提點三員大使二員副使二員秩品同壽武庫庫子一十人至元五年始立軍器庫十

年通掌隨路軍器改利器庫

廣勝庫秩從五品掌平陽太原等處歲造兵器以給
北邊征戍軍需達嚕噶齊一員大使副使各一員庫
子一人

大同路軍器人匠提舉司秩從五品達嚕噶齊一員
提舉一員並從五品同提舉一員正七品副提舉一
員正八品其屬豐州甲局院長一員應州甲局院長
一員平地縣甲局院長一員山陰縣甲局院長一員

白登縣甲局頭目一人豐州弓局使一員賽富鼎弓局頭目一人

平陽路軍器人匠提舉司秩正六品達嚕噶齊一員提舉同提舉副提舉各一員其屬本路投下雜造局大使一員副使一員絳州甲局大使一員

太原路軍器人匠局秩正七品達嚕噶齊一員局使一員副使一員吏目一員

保定軍器人匠提舉司秩從六品達嚕噶齊提舉同

提舉副提舉各一員其屬河間甲局院長一員祈州安平縣甲局院長一員陵州箭局頭目一人

真定路軍器人匠提舉司秩從六品達嚕噶齊提舉同提舉副提舉各一員其屬冀州甲局院長一人

懷孟河南等路軍器人匠局秩正七品局使副使各一員其屬懷孟路弓局院長一員

汴梁路軍器局秩正七品局使局副各一員其屬常課弓局院長一員常課甲局院長一員

益都濟南箭局秩正七品局使一員

彰德路軍器人匠局秩正七品大使一員副使一員

大名軍器局秩正七品大使副使各一員

上都甲匠提舉司秩從五品提舉同提舉副提舉各

一員其屬興州白局子甲局院長一員興州千戶寨

甲局院長一員松州五指崖甲局院長一員松州勝

安甲局院長一員

遼河等處諸色人匠提舉司秩從五品達嚕噶齊提

舉同提舉各一員其屬遼蓋弓局大使副使各一員
蓋州甲局局使一員

上都雜造局秩正七品大使副使各一員

奉聖州軍器局秩從七品大使副使各一員

蔚州軍器人匠提舉司秩正六品達魯噶齊提舉同
提舉副提舉各一員

宣德府軍器人匠提舉司秩正六品達魯噶齊提舉
同提舉副提舉各一員

廣平路甲局院長一員

東平等路軍器人匠提舉司秩從五品達魯噶齊提
舉同提舉副提舉各一員

通州甲匠提舉司秩正六品達魯噶齊提舉同提舉
副提舉各一員

薊州甲匠提舉司秩正五品達魯噶齊提舉同提舉
副提舉各一員

欠州武器局秩從五品大使副使各一員

大都甲匠提舉司秩正六品達嚕噶齊提舉同提舉
副提舉各一員

大都箭局秩從七品大使副使各一員

大寧路軍器人匠提舉司秩從六品達嚕噶齊提舉
同提舉副提舉各一員

豐州雜造局秩正六品達嚕噶齊大使副使各一員

歸德府軍器局院長一員

汝寧府軍器局院長一員

卷九十
陳州軍器局院長一員

許州軍器局秩從七品大使副使各一員

咸平府軍器人匠局秩從七品達嚕噶齊大使副使
各一員

大都弓匠提舉司秩正五品達嚕噶齊提舉同提舉
副提舉各一員其屬雙搭弓局大使副使各一員成
格勒弓局大使副使各一員通州弓局院長一員

大都弦局大使副使各一員至元三十年改提舉司

置局

隆興路軍器人匠局達嚕噶齊大使副使各一員至
元三十年置

平濠路軍器人匠局大使副使各一員至元三十年
置

大都雜造局提領二員元貞二年置

太僕寺秩從二品掌阿克塔斯馬疋受給造作鞍轡之
事中統四年設羣牧所至元十六年改尚牧監十九年

又改太僕院二十年改衛尉院二十四年罷院立太僕寺又別置尚乘寺以管鞍轡而本寺止管阿克塔斯馬疋二十五年隸中書置提調官二員大德十一年復改太僕院至大四年仍為寺卿二員從二品少卿二員從四品丞二員從五品經歷知事照磨管勾各一員令史七人譯史知印通事各二人秦差四人回回令史一人典吏二人

尚乘寺秩從三品掌上御鞍轡輿輦阿克塔斯羣牧驕馬

驢騾領隨路局院鞍轡等造作收支行省歲造鞍轡理
四集賽阿都齊詞訟起取南北遠方馬疋等事卿四員
正三品少卿二員從四品丞二員從五品經歷知事照
磨管勾各一員令史六人譯史二人知印二人通事二
人奏差五人典史二人至元二十四年罷衛尉院始
設尚乘寺領資乘庫大德十一年陞為院秩從二品至
大四年復為寺延祐七年降從三品

資乘庫秩從五品提點四員從五品大使三員正六

品副使四員正七品庫子四人掌收支鞍轡等物至
元十三年置二十年隸衛尉院二十四年隸尚乘寺
長信寺秩正三品領大鄂爾多齊哩克昆諸事卿四員
三品少卿二員從四品寺丞二員從五品經歷知事各
一員令史六人譯史知印各二人通事一人奏差四人
大德五年置至大元年改為院四年仍為寺卿五員增
少卿一員以宦者為之延祐七年省寺卿少卿各一員
定置如上

齊哩克昆諸色人匠提舉司秩從五品領大都上都
鐵局并齊哩克昆人匠以材木鐵炭皮貨諸色備鄂
爾多各枝房帳之需達嚕噶齊一員提舉同提舉副
提舉各一員吏目一人司吏四人至元二十五年置
大都鐵局秩從五品掌鄂爾多上下往來造作粧釘
房車大使一員副使一員直長一員至元十二年置
上都鐵局大使一員副使一員至元十六年置掌職
如前

長秋寺秩正三品掌武宗五鄂爾多戶口錢糧營繕諸事寺卿五員正三品少卿二員從四品寺丞二員從五品經歷知事各一員令史六人譯史知印各二人通事一人奏差四人皇慶二年置其屬二

齊哩克昆諸色人匠提舉司秩從五品掌正宮造作之役達魯噶齊一員同提舉副提舉各一員吏目一人司吏四人至大元年鄂爾多三位下撥到人匠五百九十三戶始置提舉司隸中政院後屬長信寺

齊哩克昆諸色人匠提舉司秩從五品掌領武宗軍
上北來人匠達嚕噶齊一員提舉一員同提舉副提
舉各一員吏目一人司吏二人至大元年置

承徽寺秩正三品掌達爾瑪實哩皇后位下錢糧營繕
等事寺卿五員正三品少卿二員從四品寺丞二員從
五品經歷知事各一員令史六人譯史知印各二人通
事一人奏差四人至治元年置其屬二

齊哩克昆諸色人匠提舉司二秩正五品各設達嚕噶

齊一員提舉同提舉副提舉各一員吏目一人司吏
三人至治三年置

長寧寺秩正三品掌英宗蘇喀巴拉皇后位下戶口錢
糧營繕等事寺卿六員正三品少卿二員從四品寺丞
二員從五品經歷知事各一員吏屬令史六人譯史知
印各二人克埒穆爾齊一人奏差四人至治三年置

長慶寺秩正三品掌成宗鄂爾多常歲管辦哈沙房子
行幸集賽台人等衣糧之事寺卿六員少卿二員寺丞

一員品秩同長寧寺經歷知事各一員令史六人譯史知印各二人克埒穆爾齊一人奏差四人泰定元年置寧徽寺秩正三品隸班布爾實皇后位下寺卿六員少卿四員丞二員品秩同長慶寺經歷知事各一員天曆二年置

太府監秩正三品領左右藏等庫掌錢帛出納之數太卿六員正三品太監六員從三品少監五員從四品丞五員正五品經歷知事照磨各一員令史八人譯史三

人通事知印各一人奏差四人中統四年置至元四年為宣徽太府監凡內府藏庫悉隸焉八年陞正二品大德九年改為院秩從二品院判參用宦者至大四年復為監定置如上

內藏庫秩從五品掌出納御用諸王段疋納奇實紗羅絨錦南綿香貨諸物提點四員從五品大使二員正六品副使二員正七品至元二年置署上都十九年始署大都以宦者領之復有行內藏二十八年省

之止存內藏及左右二庫

右藏提點四員大使二員副使二員品秩同上掌收支金銀寶鈔濟遼段疋水晶瑪瑙玉璞諸物至元十九年置

左藏提點四員大使二員副使二員品秩同上掌收支常課和買紗羅布絹絲綿絨錦木綿鋪陳衣服諸物至元十九年置

度支監秩正三品掌給馬駝芻粟卿三員正三品太監

二員從三品少監三員從四品監丞二員從五品經歷
二員知事一員提控案牘一員照磨兼管勾一員令史
十四人譯史四人通事知印三人奏差四人典吏五人
國初置博克遜至元八年以重臣領之十三年省博克
遜以宣徽兼其任至大二年改立度支院四年改為監
利用監秩正三品掌出納皮貨衣物之事監卿八員正
三品太監五員從三品少監五員從四品監丞四員正
五品經歷知事照磨管勾各一員令史八人譯史二人

通事知印各一人奏差六人典吏二人至元十年置二十年罷二十六年復置大德十一年改為院至大四年復為監

資用庫秩從五品提點二員從五品大使三員正六品副使五員正七品庫子五人至元二年置隸太府十年隸利用

齊哩克昆皮局人匠提舉司秩正五品提舉二員同提舉一員提控案牘一員中統元年置局至元六年

改提舉司

雜造雙線局秩從八品造內府皮貨鷹帽等物大使
副使直長典史各一員

熟皮局掌每歲熟造野獸皮貨等物大使副使直長
各一員至元二十年置

軟皮局掌內府細色銀鼠野獸諸色皮貨大使副使
直長各一員至元二十五年置

斜皮局掌每歲熟造內府各色野馬皮胯副使一員

至元二十年置

貂鼠局提舉司秩從五品提舉一員同提舉副提舉各一員至元二十年置

貂鼠局副使二員直長一員至元十九年立

染局副使一員直長一員管勾一員掌每歲變染皮貨至元二十年始置

熟皮局秩從七品大使一員副使一員典史一員司吏一人至元六年置

中尚監秩正三品掌大鄂爾多位下齊哩克昆諸務領
資成庫擅作供內府陳設帳房帘幕車轡雨衣之用監
卿八員正三品太監二員從三品少監二員從四品監
丞二員正五品經歷知事照磨各一員令史七人譯史
三人通事二人知印二人奏差五人至元十五年置尚
用監二十年罷二十四年改置中尚監三十年分置兩
都灤河三庫齊哩克昆雜造等九司局而總領之至大
元年陞為院四年復為監參用宦者三人

資成庫秩從五品掌造鹽貨提點三員從五品大使
三員正六品副使三員正七品至元二年置隸太府
二十三年始歸于監

章佩監秩正三品掌宦者舒庫爾齊所收御服寶帶監
卿五員正三品太監四員從三品少監二員從四品監
丞二員正五品經歷知事照磨各一員令史七人譯史
二人通事二人奏差四人至元二十二年置至大元年
陞為院秩從二品四年復為監定置如上

御帶庫秩從五品掌繫腰偏束等帶併條環諸物供奉御用以備賜予提點三員大使三員副使二員品秩同資成至元二十八年置俱以中官為之元貞二年增二員兼署上都之事

異珍庫秩從五品掌御用珍寶后妃公主首飾寶貝提點三員大使三員副使二員品秩同上至元二十八年置

經正監秩正三品掌營盤巴納及標撥投下草地有詞

訟則治之太卿一員正三品太監二員從三品少監二員從四品監丞二員正五品經歷知事各一員令史八人譯史四人至大四年置監卿太監少監並努圖克齊為之監丞流官為之

都水監秩從三品掌治河渠并隄防水利橋梁障堰之事都水監二員從三品少監一員正五品監丞二員正六品經歷知事各一員令史十人蒙古筆且齊一人回令史一人通事知印各一人秦差十人壕寨十六人

典吏二人至元二十八年置二十九年領河道提舉司
大德六年陞正三品延祐七年仍從三品

大都河道提舉司秩從五品提舉一員從五品同提
舉一員從六品副提舉一員從七品

祕書監秩正三品掌歷代圖籍并陰陽禁書卿四員正
三品太監二員從三品少監二員從四品監丞二員從
五品典簿一員從七品令史三人知印奏差各二人譯
史通事各一人典書二人典吏一人屬官著作郎二員

從六品著作佐郎二員正七品秘書郎二員正七品校書郎二員正八品辨驗書畫直長一員正八品至元九年置其監丞皆用大臣奏薦選世家名臣子弟為之大德九年陞正三品給銀印延祐元年定置卿四員參用宦者二人

司天監秩正四品掌凡歷象之事提點一員正四品司天監三員正四品少監五員正五品丞四員正六品知事一員令史二人譯史一人通事無知印一人屬官提

學二員教授二員並從九品學正二員天文科管勾二員算歷科管勾二員三式科管勾二員測驗科管勾二員漏刻科管勾二員並從九品陰陽管勾一員押宿官二員司辰官八員天文生七十五人中統元年因金人舊制立司天臺設官屬至元八年以上都承應闕官增置行司天監十五年別署太史院與臺並立頒歷之政歸院學校之設隸臺二十三年置行監二十七年又立行少監皇慶元年陞正四品延祐元年特陞正三品七

年仍正四品

回回司天監秩正四品掌觀象衍歷提點一員司天監
三員少監二員監丞二員品秩同上知事一員令史二
人通事兼知印一人奏差一人屬官教授一員天文科
管勾一員算歷科管勾一員三式科管勾一員測驗科
管勾一員漏刻科管勾一員陰陽人一十八人世祖在
潛邸時有旨徵回回為星學者扎瑪里鼎等以其藝進
未有官署至元八年始署司天臺秩從五品十七年置

行監皇慶元年改為監秩正四品延祐元年陞正三品
置司天監二年命秘書卿提調監事四年復正四品

上都留守司兼本路都總管府品秩職掌如大都留守
司而兼治民事車駕還大都則領上都諸倉庫之事留
守六員正二品同知二員正三品副留守二員正四品
判官二員正五品經歷二員都事四員照磨兼管勾一
員令史四十四人譯史六人回回令史三人通事知印
各二人宣使一十二人國初置開平府中統四年改上

都路總管府至元三年又給留守司印十九年併為上都留守司兼本路都總管府其屬附見

修內司秩從五品掌營修內府之事大使一員從五品副使三員正七品直長三員正八品至元八年置祇應司秩從五品掌粧漆油染表襴之事大使一員從五品副使二員正七品直長三員正八品

器物局秩從五品掌造鐵器內府營造釘線之事大使一員副使一員直長二員

儀鑾局秩正五品大使二員副使三員直長二員至
大四年罷典設署改置為局

兵馬司秩正四品指揮使三員副指揮使二員知事
一員提控案牘一員司吏八元至元二十九年置

警巡院秩正六品達嚕噶齊一員尹一員丞一員主
簿一員尉一員典史一員司吏八人

開平縣秩正六品達嚕噶齊一員尹一員丞一員主
簿一員尉一員典史一員司吏八人

平盈庫大使一員副使一員至元三十年置

萬盈庫達魯噶齊監支納大使副使各一員中統初置

廣積倉達魯噶齊監支納大使副使各一員中統初置永盈倉大德間改為廣積倉

萬億庫秩正五品達魯噶齊一員提舉一員同提舉副提舉各一員提控案牘一員司吏六人譯史一人至元二十三年置

行用庫提點一員大使一員副使一員

稅課提舉司秩正五品提舉二員同提舉副提舉提
控案牘各一員元貞元年置

八作司品秩職掌悉與大都左右八作司同達魯噶
齊一員提領大使副使各一員至元十七年置

餼廩司掌諸王駙馬使客飲食大使一員副使一員
至元二年置上都應辦所延祐五年改為餼廩司

尚供總管府秩正三品掌守護東涼亭行宮及遊獵供

需之事達嚕噶齊一員總管一員並正三品同知一員
從四品副總管一員從五品判官一員正六品經歷知
事提控案牘各一員令史譯史知印奏差有差至元十
三年置扎哈齊巴勒噶遜達嚕噶齊延祐二年改總管
府其屬附見

香河等處巡檢司巡檢一員司吏一人

景運倉秩從五品提點一員從五品大使一員正六
品副使一員正七品至元二十一年置

法物庫秩從九品大使副使各一員至元二十九年置

雲需總管府秩正三品掌守護察汗諾爾行宮及行營供辦之事達魯噶齊一員總管一員並正三品同知一員從四品副總管一員從五品判官一員正六品經歷一員知事一員提控案牘一員延祐二年置

大都路都總管府秩正三品達魯噶齊二員都總管一員副達魯噶齊二員同知二員治中二員判官二員推

官二員經歷二員知事二員提控案牘四員照磨兼管
勾一員令史九十有五人譯史二人回回令史一人通
事知印各二人奏差二十一人國初為燕京路總管大
興府中統五年稱中都路至元九年改號大都二十一
年始專置大都路總管府秩從三品置都達魯噶齊都
總管等官二十七年陞為都總管府進秩正三品領府
一州十有一凡本府官吏唯達魯噶齊一員及總管推
官專治路政其餘皆分任供需之事故又號曰供需府

焉其屬附見

大都路兵馬都指揮使司凡二秩正四品掌京城盜賊姦偽鞠捕之事都指揮使二員副指揮使五員知事一員提控案牘一員吏十四人至元九年改千戶所為兵馬司隸大都路而刑部尚書一員提調司事凡刑名則隸宗正且為宗正之屬二十九年置都指揮使等官其後因之一置司於北城一置司於南城司獄司凡三秩正八品司獄一員獄丞二員獄典二

人掌囚繫獄具之事一置於大都路一置於北城兵馬司通領南城兵馬司獄事皇慶元年以兩司異禁遂分置一司於南城

左右警巡二院秩正六品達魯噶齊各一員使各一員副使判官各一員典史各三員司吏各二十五人至元六年置領民事及供需視大都路大德五年分置供需院以副使判官典史各一員主之

大都警巡院品職分置如左右院達魯噶齊一員使

一員副使二員判官二員典史二員司吏二十人大德九年置以治都城之南

大都路提舉學校所秩正六品提舉一員教授二員學正二員學錄一員至元二十四年既立國學以故孔子廟為京學而提舉學事者仍以國子祭酒繫銜管領諸路打捕鷹房總管府秩正三品達魯噶齊一員總管一員副達魯噶齊一員同知一員副總管一員經歷知事各一員至元十七年置

宛平縣秩正六品達嚕噶齊一員尹一員丞三員主簿三員尉一員典史三員司吏二十六人至元十一年置治大都麗正門以西

大興縣秩正六品達嚕噶齊一員尹一員丞一員主簿二員尉一員典史三員司吏一十五人至元十一年置治大都麗正門以東

東關廂巡檢司秩從九品巡檢三員司吏一人掌巡捕盜賊奸宄之事至元二十一年置

西北南關廟兩巡檢司設置並同上

元史卷九十